

# 佛说嗟祿曩法天子受三归依获免恶道经

宋 法天译

## 佛说嗟祿曩法天子受三归依获免恶道经

西天中印度摩伽陀国那烂陀寺三藏传教大师赐紫沙门臣法天奉 诏译  
如是我闻。一时世尊。在舍卫国。祇树林给孤独园。与大苾刍众俱。是时有一天子。名嗟[革\*(廿/(㐁@人)/戊)]曩法。天报将尽。唯余七日。而乃先现五衰之相。身无威德。垢秽旋生。头上花鬘。咸悉萎萃。诸身分中。臭气而出。两腋之下。悉皆汗流。时嗟祿曩法。由是之故。不乐本座。宛转于地。悲哀啼泣。而作是言。苦哉苦哉。曼那吉尔池。苦哉苦哉。洗浴之池。苦哉苦哉。宝车与粗恶欢喜杂林等。如是诸园苑。不复更游戏。苦哉苦哉。跋里耶多罗迦花。永不采摘。杂宝柔软之地。永不履践。苦哉苦哉。天众妓女端严殊妙。常所侍卫。今相舍离。是时有余天子。见斯事已。往帝释所。白言天主。彼嗟祿曩法。五衰现前。命余七日。宛转在地。悲哀啼泣。作如是言。苦哉苦哉。曼那吉尔。洗浴等池。苦哉苦哉。宝车及粗恶欢喜杂林等。如是诸园苑。不复更游戏。苦哉苦哉。跋里耶多罗迦花。永不采摘。杂宝柔软之地。永不履践。苦哉苦哉。天众妓女。端严殊妙。常所侍卫。今相舍离。天主。我见是已。心甚伤切。故来告白。

尔时帝释天主。心悲愍故。往嗟祿曩法所。而告之言。天子云何。而汝贤者。宛转于地。悲哀啼泣。说诸苦事。伤动见者。时嗟祿曩法。忽闻是语。从地而起。整服肃容。合掌而立。白帝释言。天主。我今寿命唯余七日。命终之后。堕阎浮提王舍大城。以宿业故而受猪身。天主。既受彼身。于多年中。食啖粪秽。我观此苦。是故愁忧。

尔时帝释天主。闻是语已。心甚悲愍。告嗟祿曩法天子言。贤者。汝可诚心归命三宝。应作是言。归依佛两足尊。归依法离欲尊。归依僧众中尊。时彼嗟[革\*(廿/(㐁@人)/戊)]曩法天子。以死怖故。畏傍生故。白帝释言。憍尸迦。我今归依佛两足尊。归依法离欲尊。归依僧众中尊。时彼天子。受三归已心不间断。以至命终。诸天之法。下智有见。不能观上。时帝释天主。观彼天子。生于何处。为生南阎浮提王舍大城受猪身耶。为不受猪身。尽彼天眼。观之不见。又观傍生鬼界。亦复不见。又观娑诃世界人间。亦复不见。乃至四大王众天。及忉利天。尽彼观察。都不能见。

尔时帝释天主。既不见已。心生疑虑。于是帝释往祇树林。诣世尊所。顶礼佛足。退坐一面。白佛言。世尊。彼嗟[革\*(廿/(㐁@人)/戊)]曩法天子。五衰现前。命在七日。宛转在地。悲哀啼泣。说诸苦事。伤动见者。我时到彼。见此事已。而问之言。云何贤者。悲啼懊恼。憔悴若此。时嗟祿曩法。而告我

言。我今寿命。唯余七日。命终之后。堕阎浮提。生王舍城。而受猪身。于多年中以诸粪秽而为食啖。我闻此说。心极悲愍。乃告之言。今汝贤者。欲脱斯苦。当归命三宝。作如是言。归依佛两足尊。归依法离欲尊。归依僧众中尊。时嗟祿曩法。以死怖故。畏傍生故。而白我言。我今归依佛两足尊。归依法离欲尊。归依僧众中尊。时嗟祿曩法。受三归竟。而后命终。世尊。我今不知。彼嗟祿曩法。托生何处。

尔时世尊。以正遍知。告帝释言。憍尸迦。今嗟祿曩法天子。已生睹史多天。受五欲乐。尔时帝释天主。闻佛语已。欢喜踊跃。心意快然。诸根圆满。即于佛前。说伽陀曰。

|       |       |
|-------|-------|
| 若归依于佛 | 彼不堕恶道 |
| 弃舍人身已 | 当获得天身 |
| 若归依于法 | 彼不堕恶道 |
| 弃舍人身已 | 当获得天身 |
| 若归依于僧 | 彼不堕恶道 |
| 弃舍人身已 | 当获得天身 |

复说伽陀曰。

|       |       |
|-------|-------|
| 诚心归命佛 | 彼人当所得 |
| 若昼若夜中 | 佛心常忆念 |
| 诚心归命法 | 彼人当所得 |
| 若昼若夜中 | 法力常加持 |
| 诚心归命僧 | 彼人当所得 |
| 若昼若夜中 | 僧威常覆护 |

尔时帝释天主。说伽陀已。世尊印言。如是如是。

|       |       |
|-------|-------|
| 归命佛法僧 | 定不堕恶道 |
| 弃舍人身已 | 当获得天身 |

尔时世尊。说伽陀曰。

|       |       |
|-------|-------|
| 若佛陀二字 | 得到于舌上 |
| 同彼归命等 | 不虚过一生 |
| 若达磨二字 | 得到于舌上 |
| 同彼归命等 | 不虚过一生 |
| 若僧伽二字 | 得到于舌上 |
| 同彼归命等 | 不虚过一生 |

又说偈言。

|         |         |
|---------|---------|
| 佛法僧名若不知 | 彼人最下故不获 |
|---------|---------|

轮回宛转而久处 如迦尸花住虚空

佛说是经已。诸苾刍众。天帝释等。一切大众欢喜。信受作礼而退。

佛说嗟祿曩法天子受三归获免恶道经